

玉海



040
1000:15
34823

浚儀王應麟伯厚甫

聖文

御製論

魏文帝典論

隋志儒家典論五卷魏文帝撰

唐志同隋志有字石經典論一卷

文帝初在東宮著典論詩賦百餘篇集諸儒於肅成門講論大義以素書餉孫權又以紙寫一通與張昭

明帝太和四年二月戊子刻石于廟門之外及太

學與石經並以示來世

以孫權不服班太宗論于天下明示不願征伐也

著太宗論 本紀注載典論自敘 魏志注引典

論 文選載論文

唐高宗股肱論

顯慶二年六月上製元首前星維城股肱誠次著股肱論令許敬宗註釋名曰天訓

唐元宗周易大衍論

志元宗作周易大衍論三卷

祥符勤政論 俗吏辨 祥瑞論

祥符五年八月丙午真宗作勤政論俗吏辨示近臣曰近聞中外議論以朝廷當總覽大事斥去小務以

元默爲上德以簡易爲聖治故能恢至靜之化逃苛
酷之議且王者心稍自逸人卽受弊若宴居中禁爲
樂終日忽在予之責之難外有機務雖可屬于攸司
內有心志其何檢于放逸且邦家之事刑政而已政
令一出爲安危之基刑辟一施有死生之法人以爲
小吾以爲大小務不親必倦于大政大政一倦孰思
于永圖又當謹之於始制之于後向所謂元默者謂
無嗜好簡易者謂無滋奇卓異乎不事其事獨樂其
樂者也又古人受命于帝庭制治于官次夙夜匪懈
不得啓處及乎晉室始尚清談放逸有高士之名勤

勞得俗吏之目居官蒞職當晝而忘食宵而忘寢功名有所立富貴不為泰則小人以為俗吏國家以為蓋臣也宰相等咸請聖製出示朝堂從之 長編五

年八月丙午上作祥瑞論勤政論俗吏辨賜輔臣人一本因曰始聞中外有議及朝廷崇奉祥瑞躬親細務者故著此以曉之輔臣請于朝堂宣示百官詔聽近臣就中書繕寫丁謂請于國學刻石從之十月庚戌國子監孫奭等言國學先許以聖製祥瑞勤政論俗吏辨三篇刻石望特賜宸翰從之 七年四月己巳百官觀于國子監 祥瑞論大指謂明皇有不祥而祇畏中人觀嘉

應而侈泰是以春秋不書其事然神祇亦以揚祖宗之烈當欽承而宣布之若恃休祺而自肆固宜戒也

祥符崇儒術論

為君難為臣不易

祥符五年十月辛酉真宗以崇儒術為君難為臣不易二諭示王旦等先是龍圖閣學士陳彭年等因奏對上謂之曰儒術污隆其應甚大國家隆替何莫由斯故泰衰則經術道息漢盛則學校興行其後命歷迭改而風教一揆有唐文物最盛朱梁而下王風浸微太宗丕變弊俗崇尚斯文朕獲紹先業謹遵聖訓禮樂交舉儒術化成實二后垂裕之所致也又曰為

君之難由乎聽受臣之不易在乎忠直其或君以寬大接下臣以誠明奉上君臣之心皆由于正直而行至公相遇此天下之達理先王之成憲猶指諸掌孰謂難哉彭年曰陛下聖言精請足使天下知訓伏願躬演睿思著之篇翰頃之以二論示彭年復請示輔臣且等因請赴國子監刻石從之

祥符解疑論

祥符六年孫奭上言國家祠祀巡幸多用開元故事且明皇政治多缺非全德之君不可遵法十月丁丑上作解疑論示之因語左右曰國家勤稽古制止如

今日之百官率多秦置豈可以秦暴而廢耶但詢之
古道擇善而行何謂不可因言開元天寶政事優劣
曰姚崇宋璟真名相也明皇委之無疑誠爲至當而
過聽林甫國忠斯可惜也王旦曰奸邪之人誣害良
善其言似忠人主難辨外人罕敢極言取禍故國忠
林甫得以專橫人君若能察好陷人而自進者十可
見其七八唐室危而人歸唐德者賴祖宗仁愛浸厚
也 趙安仁述論疏爲獻

祥符皇帝伯四論

五臣論

樂府文論

寶錄

祥符八年四月四日癸丑召輔臣觀書玉宸殿

王欽若陳堯叟馮拯趙安仁預焉始觀太宗御書移
御別殿觀皇王帝伯四論良臣正臣忠臣奸臣權臣
五論幸水軒垂釣侍臣賦詩辛酉賜輔臣御製五臣
論各一本從所請也九年二月癸卯召近臣登翔鸞
閣觀太宗御書因示聖製太宗聖文神筆頌玉宸殿
記五臣論樂府辭上作歌詩二篇命從臣賦詩宴玉
宸殿聖製或刻石題板或朱黃書于石壁從臣祇誦
聖藻莫測淵蘊學士李維謂人曰讀五臣論大意賞
良臣而樂善人也 會要觀聖製樂府文論上曰朕
著述唯以寓意豈敢工王旦曰披誦聖製神伏心解

天禧思政論 會靈觀銘 元符觀頌

天禧元年二月戊寅作會靈觀銘元符觀頌思政論
名輔臣至龍圖閣示之 仍出正說春秋要言清景殿

書事詩

庚辰中書樞密院上書蒙宣示思政論言已

輟于述作專親政務望特頒睿制以廣風教九月丁
巳以御製思政論正說賜輔臣近臣從龍制李虛已
之請也 詩題十事歌戒三惑守官有箴思政有論
御集有論九卷述一卷

天禧三惑論

天禧元年二月辛巳上作三惑論并歌績畫刻板摹

本以賜輔臣 仁宗乾興元年八月辛亥以三惑論
賜輔臣

天禧寬財利論

天禧二年七月甲戌以樞密直學士李士衡爲三司
使罷陝西市米募民送京師如入粟法以售鹽及牟
綱任民私市以足數關輔民大便說之上寬財利論
以賜之又出內藏錢二百萬以助經費其年十二月
庚戌士衡請刻石本廳從之

天禧敬器論 戒酒論

天禧二年九月辛巳紀九月 庚辰上作敬器論戒酒論稼

稽倍登詩以示輔臣乾興元年八月辛亥以敬器論
賜輔臣

慶曆危筆論 一作論

慶曆四年三月己卯帝御邇英閣出危竿論一篇述
居高謹危之意顧侍讀學士丁度等曰朕觀書之暇
取臣僚上言及進封事有可施于政治者書以分賜
卿等度暨侍講曾公亮楊安國王洙等既拜賜因注
釋其義從之 元祐六年劉摯奏仁宗所錄三十六
事內危竿論聖意以爲人君處至危之地譬如危竿
須用正直之木古人謂邪蒿人君不可食以其名不

正況邪佞之人乎

乾道用人論

乾道五年十一月五日丁巳御書御製用人論賜宰
臣陳俊卿等略云邪佞亂真比比皆是知人則哲帝
王所難哲王用人廣獨智以照臨稽衆論而遴選擇
不厭精任不厭久 俊卿對選德殿詔換用人說今
在集中與宸翰文異而指同 孝宗之用人也即陟
郡勞臺登縣績武優轉級職待有勲課儒生以金張
角進士以弧矢嚴更迭之法以練才實躬臨遣之勤
以達壅蔽朝士闡官乃除無需次之淹要郡留闕選

才無輕投之冗黜賊吏之世賞進軍功於流內

淳熙御製論

六年十一月乙卯御製論數百言欲革取士用人之弊及信賞必罰之法俾輔臣宣示侍從上曰此唯欲戒飭臣下趨事赴功而已

會要六年十一月一日

宰臣趙雄等奏欲就堂中請侍從宣示御製上曰此論欲戒飭臣下趨事赴功而已雄等奏陛下訓教如此何啻迅雷臣等及中外大小之臣無不震懼七年五月一日御製良石銘跋賜雄等

淳熙原道辯

八年御製原道辯曰以佛修心以道養生以儒治世愈之論從其跡而已文成以示侍讀史浩浩奏曰愈作是篇所主在帝王傳道之宗乃萬世不易之論聖學高明融會釋老使歸于儒末章乃自生分別大學之道自物格知至至于天下平可以修心養生治世無所處而不當何假釋老之說耶望陛下竄定末章則善矣侍講程大昌亦言之於是易名三教論

孝宗輯敬天之圖頒恤民之詔反安南之象則旅獒之不蓄觀御苑之麥則無逸之先知乾文參乎典謨宸畫麗乎河漢嘉陸贄之忠蓋采崔寔之達權製

贊以美孝德之感作賦以闡造化之工歌詩以發規
恢之雄述論以飭用人之道旨義渾噩表裏六經臨
策貢士命舉賢良東觀閣書西雍講禮足以宣其文
辨拔將校砥練師屯細柳按軍射殿閱士足以鬯其
武

淳祐忠邪辯 仁厚論

御製記序

唐太宗帝範序

見文苑英華

唐太宗御製述聖賦序

見文苑英華 又見賦類

唐麟德殿宴百僚詩序

王緯謝表手詔賜以皇太子所寫聖製麟德殿宴百僚詩序御製中和節詩序日月揚光風雲動色 邁殷湯之晨露掩虞舜之薰風 鸞鳳之勢鍾王莫儔掩鍾張之筆札竝虬鸞以飛動 日月爛其光彩風雲蔚其氣色 開元二十五年邢璣冊新羅上製詩序太子已下及百僚賦詩送之

舊史

唐聖教序 雍熙聖教序

志釋氏類元範注二帝三藏聖教序一卷 太宗高宗

兩京記元奘與惠明靈潤等釀定六百五十七部

太宗制三藏聖教序 太宗序云三藏要文凡六百五十七部 見文苑英華

高宗爲太子又爲述聖記並勒碑銘置慈恩寺浮

圖 永徽四年十月褚遂良書 開元二十三年九月

親注金剛經及修義訣 雍熙三年十月戊午出御

製新譯聖教序賜宰臣李昉等咸平二年七月壬寅

製繼作聖教序 仁宗述三寶贊以冠藏錄

唐高宗東殿新書序

見承詔撰述

唐元宗道德經序

元宗道德經序撮其指歸雖蜀巖而猶病摘其章句自河公而或略隨意所得遂爲箋註

唐元宗孝經序

見藝文孝經類

唐元宗六典序

見典故類

唐穆宗長慶宣明曆序

見曆法類

建隆應天曆序

太平興國乾元曆序

乾德元年四月作建隆應天曆序 興國七年十月
作乾元曆序

開寶本草序

開寶六年四月製重定神農本草序

太平興國平晉記

四年五月壬午劉繼元降己丑上作平晉賦及詩令
從臣和丁酉以行宮為平晉寺上作平晉記刻石寺
中 皇祐五年三月甲子詔奉安太宗聖容于并州
資聖院繞平殿七月戊申謂輔臣曰并州四月二十
二日奉安聖容仍以平晉記來上與車駕至太原城

下之日同何其異也

景德乾坤寶典序

景德二年五月司天少監史序上四百一十七卷上
作序

景德御製三記

景德四年正月己未車駕進發丁卯至安昌熙三陵
朝拜二月己巳次西京癸酉詔藝祖誕生之地建神
御殿如啓聖院制度庚寅召輔臣於內東門觀太祖
彈元壁初開寶九年太祖幸西都因行郊禮嘗戲彈
於門之北壁其迹三存焉上觀之興感命有司設龕

護之。至是啓而觀焉。辛卯發西京。三月巳亥。至自西
京。三月乙巳。召輔臣登太清樓觀書。出御製太清樓
新寫御覽書籍。西京內東門太祖皇帝彈元壁二記。
王旦等請以副墨爲賜。許之。甲子。內出聖製太清樓
新寫御覽書籍。西京內東門彈元壁二月朝拜諸陵
因幸西京。記賜輔臣人一本。四月戊辰。以御製御書
三記。賜待制尚書侍郎等。從所請也。八月丁巳。遣使
以御製三記。賜兩制館閣羣臣。從其請也。十月乙巳。
御史中丞王嗣宗等表求三記副本。王旦曰。陛下性
與天道發爲聖文中。丞掌蘭臺石室書。願可其奏。從

之

堯沈璧于河爲握河記今尚書中候是也

帝王世紀

祥符封禪記序

祥符元年十二月製封禪記序

祥符泰山銘記

泰山銘贊

二年五月戊午出泰山謝天書述二聖功德銘玉女像記示輔臣十月丙午以御製泰山銘贊賜丁謂等九軸因請以御製泰山銘及九天司命天齊王周文憲王文宣武成王贊於朝堂宣示百官各近臣就三司觀之帝曰此但記一時事何足宣示宰臣王旦等

固請從之尋分賜近臣翌日稱謝十一月壬子朔泰山太平頂磨崖刊聖製畢三年正月戊寅二十作觀新製泰山銘記周備書懷五言詩賜旦等屬和

祥符宸章集序

冊府元龜序

御製游

藝集後序

見前

寶文統錄序

法寶錄

序

祥符三年四月丁巳龍制陳彭年上準詔纂歷代帝王集正位十五卷闋位十卷帝作序賜名宸章集

六年八月壬申作新修冊府元龜序丁亥又出御製

法寶錄序

八年十月乙巳製先天紀序

九年三

月巳酉作寶文統錄序

王欽若定道藏經總爲目錄

賜名寶文統錄

易象旣備文王作乎繇辭典誥旣

刪宣聖制其書序

祥符諸王唱酬詩集序

五年三月庚寅作

共四首

祥符聖祖降臨記

五年十月戊午聖祖降臨于延恩殿己未札示中外
庚申羣臣詣崇政殿賀晁迥等請改殿名及御製銘
頌以章降格之慶詔曰可乃改延恩殿曰真游十一
月庚子御製聖祖降臨記及真游頌以示輔臣焉明

年二月丙寅名宗室觀真游聖祖降臨之迹 九年
十月乙酉出聖祖篇翰等及降臨內記真紀于龍圖
閣示輔臣 天禧三年六月戊申名宗室近臣等請
真游殿觀像設仍賜御製聖祖降臨記人一匣云
實錄 天禧三年三月戊午內出聖祖降臨內記四十
卷示輔臣

祥符資善堂記

祥符八年十二月辛卯制授皇子慶國公忠正軍節
度使壽春郡王九年二月十八日甲午詔元符觀太
子就學新堂宐以資善爲名因製記是年四月戊戌

張士遜請以聖製資善堂記刻石堂壁從之

皇子壽春郡王

仁宗也

天禧三年正月乙未朔上詣元符觀宴宗室

于資善堂辛亥宴從臣召壽春郡王府官屬預焉出聖製資善堂記

祥符玉宸殿記

祥符九年二月癸卯召近臣于翔鸞閣示聖製聖文神筆頌玉宸殿記五臣論樂府辭遂宴于玉宸殿刊石翔鸞閣又作詩命從臣和 玉宸殿蓋上宴息之所中施御榻帷帳皆黃繒爲之無文飾殿東西聚書八千餘卷上曰此惟正經史校定者小說他書不預

見景德四年
三月乙丑

御集有序八卷記六卷

慶曆觀文監古圖記

慶曆元年七月戊申朔上命圖畫前代帝王美惡之事可爲監戒者號觀文監古圖上自爲記名輔臣至迎陽門觀之元祐五年五月范祖禹乞覽此圖

皇祐三朝訓鑒圖序

皇祐元年二月內翰李淑知制誥楊億編纂成十卷御製序

皇祐大饗明堂記序

皇祐三年二月九日製明堂記序 御集有欽崇禮

祀記三卷

治平資治通鑑序

四年十月甲寅翰林學士司馬光初讀資治通鑑神宗親製序面賜光令候書成日寫入又賜穎邸舊書二千四百二卷

賜舊書不在此時今從帝學并書之

詳見編年類

崇寧辟雍記

三年十一月御製

紹興損齋記

二十八年八月晦復古殿書御製損齋記蕩心侈目

惑心害性者罔不掃除清心寡欲省繆薄費者奉以周旋揮毫弄墨真草自如濃淡斜行茂密如意未能忘情似賢乎已朝夕清燕視以自儆以漢武明皇爲戒凡二百五十八字吏書賀允中請布之中外十月庚寅上謂宰執曰朕宮中嘗闢一室名爲損齋屏去聲色玩好置古書經史其中朝夕燕坐亦嘗作記以自儆沈該等請降御札以啟迪在位於是內外碑刻

一云親札石刻百本

賜百官皆表謝又賜諸路監司帥臣及諸

州學各一本上曰允中嘗于經筵問朕好道之意朕謂之曰朕之所好非世俗之所謂道也治道貴清靜

故恬淡寡欲清心省事所謂爲道日損期與一世之民同躋仁壽如斯而已當降出碑本賜卿等又惟比年侈靡成風如昏祭之類至有用金玉器者不可不戒於是降詔諭中外如上旨羣臣言太宗評經史章聖思政論仁宗三十五條皆著國史請宣付史館一本云十月庚寅出是記示宰執因請班于中外又以親札付史館會要作十一月非也

高宗發爲宸章雲漢昭回裁詩樂以侑禋祀則十二篇涵風雅之妙記損齋以明鑒戒則數百言皆道德之辭

高宗御製翰墨志

乾道御製聖政序

乾道二年九月御書御製光堯聖政序一云二年十

月三日製序仍書賜叅政蔣芾芾等請勒之秘府與

河岳大訓並傳

紹熙三年十二月四日進孝宗聖

政先二日親製序仍書賜宰臣留正慶元六年二

月二十二日進光宗聖政翌日製序書賜叅政臣深

甫並刻石秘府

紹定緝熙殿記

見殿類

寶祐資善堂記

寶祐二年製資善堂記祖宗以仁厚爲心法以問學爲家法踐阼以來欽若往則謹刑有銘仁厚有論曷嘗一念不本乎仁敬天有圖緝熙有記曷嘗一息不敏乎學矧予元子穎悟夙成甫佩鯨鰲良心純一善端之萌如泉始達迎之而充此其機也繼自今毋侗好逸毋適宵人思閭閻之隱而毋爲富貴所移念稼穡之難而毋爲紛華所惑孝弟以爲仁之本惻隱以充仁之端弦焉誦焉學之以聲禮焉書焉學之以事

則德修而罔覺習貫而自然資善之益豈淺淺哉

御製論述

唐金鑑述

正觀二年正月庚午帝著金鑑述以示侍臣其略曰
至治未嘗任不肖至亂未嘗任賢任賢則享天下之
福任不肖則罹天下之禍宣宗大中初令狐絢爲翰
林學士他夜召與論人間疾苦帝出金鑑書曰太宗
所著也卿爲我舉其目絢摘句舉此帝曰善朕讀此
凡三復乃已絢再拜曰陛下欲興王業捨此孰先詩
曰惟其有之是以似之

本傳

張蘊古大寶箴云爰

述金鏡窮神盡聖使人以心應言以行包括治體抑揚詞令 政要太宗曰朕當保此三鏡以防已過又曰金鏡書御覽載此篇云金鏡述

祥符奉天庇民述

祥符三年上將祀汾陰王旦曰漢唐因巡幸行禮未有特祭陛下爲民祈福不憚櫛沐上曰但冀民獲休祥於朕無憚謂近臣曰自十二月朔當食蔬食宰相再三請上曰太祖太宗每奉郊禋皆屏昏茹朕三祀員丘悉奉行之顧外庭不知耳東封亦自戒塗蔬食十二月巳巳遂作奉天庇民述以論之唯壇行宮舊

路在后土廟前上曰朕未謁廟廷而輿輦儀仗先過
其前非夤恭之意遂令有司鑿路由廟後而出會要三年
十二月巳巳作實錄祥符三年十二月巳巳上作
示羣臣王旦等
奉天庇民述曰王者上承天下佑民在罄誠明而勿
貳守典訓而靡忘況邦之大事在乎接神苟或接神
而不恭何以爲民而祈福

祥符奉神述

祥符四年五月乙未詔加上五岳帝號遣官奉冊六
月乙巳上作奉神述曰況惟此舉本用庇民在乎眇
躬且絕私禱尚虞率土未照此誠乃牽課成文庶幾

言志云耳七月丁亥資政殿大學士向敏中等請以
聖製奉神述刻石遂親書刻石于奉神觀九年三月
庚申丁謂請刻石于會靈觀從之

書目一卷祀汾陰

還述以論中外

皇祐五年正月觀火更名集禧六

月觀成舊止西偏建一殿祠五岳名奉神殿命知制

誥蔡襄重模故本仁宗拱立命襄進讀立石東廡名神藻殿

宗實錄

天禧欽承寶訓述

天禧元年正月辛丑朔改元謁玉清昭應宮薦獻玉
皇上冊寶壬寅上聖祖帝號己酉上太廟謚冊庚戌

饗宗室辛亥恭謝天地于南郊御天安殿上冊尊號
乙卯命宰相宣讀天書于天安殿遂謁玉清昭應宮
二月甲戌上作宣讀天書欽承寶訓述示羣臣

天禧元良述

天禧三年九月二十三日丙子召宗室近臣對于清
景殿內出御製賜皇太子元良述六藝箴各一卷承
華要略十卷授時要略十二卷又以御覽國史兩朝
實錄太宗御集等賜皇太子命從徧閱之十二月辛
卯賜輔臣元良述六藝箴各一卷承華要略各十卷
帝範訓戒冠履相絕 又有元良箴 禹典貽子

孫文謨佑後人 元者善之長

慶曆觀文鑒古圖述

見圖類 書目仁宗御集有觀文鑒古圖述十卷

仁宗康定二年

即慶曆之元

采摭前代君臣故實可爲鑒

戒者分列爲圖隨事親述并序 上始黃序夢帝賚

弼下迄李唐褒忠賞直 紹興五年閏二月丙寅上

曰朕昨日見毛剛中所進鑒古圖乃仁宗卽位之初

采古人行事之迹繪而成圖便于省閱因以爲鑒

慶曆危筭論

見前

皇祐欽器論後述

見欽器類 四年四月庚辰御邇英閣示講讀官先是真宗作論上爲後述以申進退存亡虧成之監丁慶等請宣布于外上不許

虞舜勅天之歌大禹臨民之訓成湯官刑之制炳耀千古若夫風之安不忘危金鏡之任賢去不肖抑其次也 仰觀俯察而日月之代明星辰之羅布山川之流峙草木之生息凡物之相錯而粲然不可紊者皆文也堯之蕩蕩不可得而名而僅可名者文章也

夫子之言性與天道不可得而聞而所可聞者文章也然則堯之文章乃蕩蕩之所發見而夫子之文章亦性與天道之流行謂文云者必如此而後爲至自伏羲所畫黃帝所名箕子所陳仲尼所繙微辭與義意會心徹 仰聖人而知衆說之小 天臨日鏡鼓元氣而雷域中騰百川而雨天下 仁覆德載

繼明嗣睿 運陶鈞於寶思 英華颯颯 馳仁

聖之極摯蹈帝王之登閔 德高假樂聲繼猗那

以武功定海內刮疵剔瑕乾清坤寧以文德化天下

驚潛燭幽霄動日潤 憂切韶濩 堯醲舜薰 寶

跼運思步障申戒細札之頒皇覽之作 煥乎之文
大哉之言 天清地明日燭月霽 赫赫我宋崇雅
右文藩飾萬物如歲之春 乾健離文雷動淵默
日暉川鏡乃武乃文 樂華會舉禮葉有垂 重雍
襲熙玩心神明 襟道佩德軌堯知舜 繩武衣
言漢倬星輝 天文昭回八表皆燭睿藻稽古六經
不刊 慶霄分暉溫洛開奧

玉海卷第三十二

三
卷
三
二

三
二

一
百
四
十
三

玉海卷第三十三

浚儀王應麟伯厚甫

聖文

御書

伏羲龍書 神農穗書 少昊鸞鳳書

堯龜書

韋續字源云包犧氏獲景龍之瑞始作龍書炎帝神農氏因上黨嘉禾入穗乃作穗書用頒時令黃帝因卿雲見作雲書堯因靈龜負圖作龜書少昊作金天鸞鳳書高陽氏製科斗書

亦見墨藪書斷

夏禹螺書

禹碑綠字

王漢相三十三

二百七十九

又粹崔融碑曰於鏢大禹顯允天德龍畫旁分螺書

徧刻韓愈詩岫巖山尖神禹碑科斗拳身薤葉披

鷲飄鳳泊拏虎螭劉禹錫詩嘗聞祝融峰上有神

禹銘晉志禹受綠字墨藪夏后氏作鐘鼎書又

書斷書注神龜負文列于背禹第之成九類淳

化法帖有禹書真誥三皇之世演八會之文爲能

鳳之章雲篆之跡文房四譜黃帝得玉一紐治爲

墨海上篆文曰帝鴻氏之硯衡山記甘泉東有石

壁禹所刻文在此

漢高祖手勅

隋志總集梁有漢高祖手詔一卷

古文苑漢高

祖手勅太子

韓王信傳上賜信書責之

漢武帝賜淮南書

見詔策

漢寶跗

見器物類

墨藪鶴頭偃波書詔板所用漢尺一之

簡是也蚊脚書上詔板也

漢光武賜方國手迹

循吏傳以手迹賜方國者皆一札十行細書成文勤

約之風行于上下

隗囂傳帝報以手書

公孫述

傅帝與述書又下詔諭述曰詔書手記不可數得

唐真草書屏風

會要正觀十四年四月二十二日太宗自爲真草書屏風以示羣臣筆力遒勁爲一時之絕初募求人間書凡真行二百九十紙裝爲七十卷草二千紙裝爲八十卷每聽政之暇則臨看之嘗謂朝臣曰書學小道初非急務時或留心猶勝棄日凡諸藝業未有學而不得者也病在心力懈怠不能專精耳今吾臨古人書殊不學其形勢惟在求其骨法及得骨力而形

勢自生耳吾之所爲皆先作意是以果能成也

又見

張懷瓘敘書法

王羲之傳制曰煙霏露結狀若斷而

還連鳳翥龍蟠勢如斜而反直心慕手追此人而已

唐太宗飛白詔

權德輿記曰太宗文皇帝飛白書十二句五十五字者正觀十六年答左散騎常侍劉洎之詔也縹緲鴻翥之勢輕濃蟬翼之狀子敬白而不飛子雲飛而不白稽合衆美裁成絕藝書圃之逸品也

通鑑正觀

十八年四月洎上書上飛白答之曰今聞讜言虛懷以改

梁武謂蕭子雲曰蔡邕飛而不白羲之白而不飛

顏師古聖德頌礫略新勢奮發奇鋒 李嗣真曰飛

白猶煙空焰灼霧縠卷舒 鮑照飛白書執銘超工

八法盡奇六文鳥企龍躍珠解泉分珪角星芒明麗

爛逸絳紫髮垂平理端密君子品之是最神筆 唐

李約飛白贊曰蕭子雲始變蔡張二王飛白古法又

作小篆飛白惟建業古壁餘此蕭字崔備有子雲飛白蕭字記張

王繼作了雲精極翻飛露白乍輕乍濃浮雲委地游

霧縠空煙霧交霏蚪鸞飛動 李嶠賀見御書表究

黃軒鳥迹之巧禪紫府結空之勢偃波垂露會寶惠

而成新半鬼全蟻象天形而得妙 蘇軾作文同飛
白贊曰霏霏若輕雲之蔽月翻翻若長風之卷旆倚
猗若游絲之縈裊裊若流水之舞 天聖四年錢惟
演爲飛白書序錄一卷 劉劬飛白書勢曰素幹冰
解蘭墨電擱直隼箭馳屈擬螭螫

唐正觀飛白書 飛白扇

會要太宗攻義之書尤善飛白

帝王隸書又好飛白于王衛之間別更立

意精妙絕倫

正觀十八年二月十七日辛酉召三品以上

賜宴于元武門太宗操筆作飛白書羣臣乘酒就太
宗手中相競散騎常侍劉洎登床引手然後得之其

不得者咸稱洎登床罪當死請付法太宗笑曰昔聞
婕妤辭輦今見常侍登床是年五月五日太宗爲飛
白書作鸞鳳蝶龍等字筆執驚絕謂司徒長孫無忌
吏部尚書楊師道曰五日舊俗必用服翫相賀今朕
各賜君飛白扇二庶動清風以增美德 劉洎上書
曰紆寶思于天文則長河韜映擣玉筆于仙札則流
霞成采固已錙銖萬代冠冕百玉 岑文本述飛白
書勢詩有飛毫拂素鳳舉鸞驚之句 端拱元年□
古墨跡藏秘閣唐太宗元宗墨迹

唐太宗賜馬周飛白書

馬周爲中書侍郎正觀十八年

表八月丁卯

遷中書令太

宗以飛白書賜之曰鸞鳳冲霄必假羽翼股肱之寄要在忠力 太宗嘗體日羣臣各有其詞

唐太宗筆法

文房四譜唐太宗筆法云攻書之時當收視聽絕慮怡神心正氣和則契于元妙 墨藪正觀六年正月八日整理御府書鍾王等真跡得一千五百一十卷

唐李靖家藏高祖太宗詔書

太宗手墨

李靖傳五代孫彥芳太和中爲鳳翔司錄參軍家藏高祖太宗賜靖詔書數函上之一曰兵事節慶曆

付公吾不從中治也一日有晝夜視公疾大老嫗造
來吾欲熟知公起居狀皆太宗手墨他大略如此文
宗愛之不廢手

其舊物有佩筆以木爲管劉金其上

別爲環以限其間筆尚可用也靖破蕭銑所賜于闐
玉帶十三夸七方八刃各附環以金固之所以佩者

又有火鑑火觴算囊等物常佩于帶者天子悉留禁

中詔本還賜彥芳并束帛衣服物權德輿嘗讀太宗

手詔至流涕曰君臣之際乃爾耶 韋端符記曰文

帝賜書二十通多言征討事 太宗製魏證碑文并

御筆書石

唐龍朔與遼東諸將書

會要龍朔二年四月上自爲書與遼東諸將謂許敬宗曰許圜師嘗自愛書可於朝堂開示圜師見而驚喜私謂朝官曰圜師見古跡多矣魏晉以後惟稱二王然逸少少力而妍子敬妍而少力今觀聖跡兼絕二王鳳翥鸞迴實古今書聖

圜師傳曰高宗自書詔

賜遼東諸將

唐高宗賜侍臣飛白書 贊

戴至德傳爲宰相咸亨中

實錄咸亨五年八月戊寅朔

高宗爲飛

白書賜侍臣賜同東西臺三品戴至德曰汎洪源俟

舟楫同東西臺三品郝處俊曰飛九霄假六翮同中

書門下三品李敬元曰資啓沃磬丹誠中書侍郎崔

知悌曰竭忠節贊皇猷皆見意于辭

又書隱士田游巖宅榜其門

崔知悌傳與戴至德郝處俊李敬元等同賜飛白

書贊而知悌敬元以忠勤見表

議者以戴郝寬厚而李崔忠勤故帝以此

言褒美

冠六文而首出掩八體而孤騫眇乎若游霧

之拂春林靄乎似輕雲之上秋漢

李嶠謝飛白

飛

白始於蔡邕待詔鴻都撰聖皇篇見役人望帝因成

字邕之後有張敬禮備盡其妙王僧虔曰是八分之

輕者

創法於八分窮微乎小篆

唐御書集賢院額

王維素有謝表云陛下發求書之使置寫書之官九

流百家韋編緗帙然虎觀盛彼鴻都自運銀鈎俯

題金榜龍騰金榜張說謝御書大通禪

師碑額狀云畫起平雲點蹲芒玉戈矛攢倚鸞鶴交

飛台州桐栢觀碑元宗御書額天寶元年三月

觀韓其碑王屋山陽臺觀微開元中御書

額自題集賢注記開元二十六年十二月御書

開元觀寺額以天寶元年五月加天寶寺上

改題姚崇碑元宗御書張說銘云仙翰鏤

豐珉帝命頻軫仙毫特紆錫金刻石鳳篆詔圖又

握乾符頌曰文含五律字吐銀鉤明皇雜錄拾遺

祭孚進龍池篇其詞甚美上為八分書賜岐王王因

製龍池曲以其篇為樂章崔澄傳元宗以謹密字

親書笏端一王君奐傳詔張說刻文墓碑帝自書以

寵之一行傳上為一行製碑文親書於石司馬

子微傳元宗為親製碑文元宗題張說父碑額曰

積善謝表曰孔蒙吳北御書盧懷謹碑題韓思

復碑曰有唐忠孝韓長山大相國寺先天中御書

題榜孝經序寫之琬琰庶有補於將來五色牋

八分書學士贊

御書刺史詩三傑詩

並見上

手

寫六條

見六典

開元以降御題碑榜標桐柏以尊

道揭麗正以崇儒

顏真卿請肅宗題放生池碑額

德宗正元四年八月御書章敬寺額

順宗善隸

書

穆宗問柳公權筆法對曰心正則筆正帝悟其

以筆諫

宣宗御筆題崔氏德星堂

僖宗光啓元

年書孫氏書樓

帝中第一

王僧虔對齊高帝

五

色絲綸九霄雨露

符載

舞鳳回翔於懷袖飛龍顧

盼於縑緗

元稹謝御札

唐明皇書道德經

三石齋書影 三十一
三百五十六
祥符三年十月己巳王貽慶獻明皇所書道德經

九域志亳州有道德經碑明皇書

開元間書六大字賜醴陵縣登真宮太宗時取閱而
還之又賜御書飛白字 張說謝示金字八分道經
曰天毫發彩 太平興國三年正月丁酉潭州輦送
唐元宗所書道林寺王喬觀二碑

楊子曰聖人肆筆而成書 漢元帝善史書應劭注

史籀大篆 宋高祖縱筆爲大字一字徑尺一紙不

過六七字 章帝好杜度草書因名章草 章帝賜

韓稜寶劍自手書其名 後漢姜肱傳注引謝承書

靈帝手筆下詔 魏楊阜傳天子感其忠言手筆詔
谷 梁武帝評書從漢末至梁有三十四人

建隆御札

三年二月二十三日內出御札曰渴聽讜言庶臻治
道今朝臣以次轉對 太祖御書大宋一統賜王溥

乾德親郊御札

元年八月一日

庚辰朔

內出御札以十一月十六日

子甲

有事南郊

開寶五年八月李符為京西轉運書李

符到彼似朕親行賜之揭于大旗符條奏便宜百餘
其四十八事施行著于令 紹興十六年四月十日

日修武郎張燕上太祖御書一卷賜帛 洪适進太

祖御筆六卷

親征澤潞有賜孝明皇后御札

天禧

四年二月光祿丞沈惟溫故相倫之孫獻太祖與倫
御書十六日賜進士出身 宣和四年三月五日幸
祕省上親出建隆真跡詩帖數幅於是羣臣始識藝
祖書又出太宗真仁宗翰墨至神考書孟子章句上
曰此藩邸所作也

雍熙草書

雍熙二年出御草書謂宋琪曰朕聽政之外未嘗書
寢讀書寫字自得其趣正書之外草書飛白尤愛臨

學雖非帝王事業但遊暇聲樂性所不好宮中釋悶
惟書籍筆札而已琪曰陛下躬親庶務固前代所未
有又讀書染翰無有弃日信聖心務學之至也嘗夜
召書學葛湍問徐鉉草書如何湍曰鉉留心籀篆不
聞草聖上曰鉉嘗見朕書否湍曰臣僚非詔賜無由
得觀上喜於軸中出御草書二紙曰一以賜汝一以
賜鉉

太宗實錄

興國中王著習義獻草隸擢爲侍

書 趙壹曰草書之興其於近古乎 書斷曰草書
之先因於起草杜伯度章帝所好作章草書

雍熙賜近臣詩 草書扇

雍熙二年五月癸亥賜近臣御製五言詩草書扇各一又草書李白廬山瀑布詩共二十幅分賜之 摛藻尺素之上弄翰團扇之中

雍熙賜宰臣飛白書

雍熙三年十月丙申朔上出飛白書一軸賜宰臣李昉等曰朕退朝之暇未嘗虛度光陰觀書之外嘗留意於真草近又學飛白書此雖非帝王事業然不猶愈於遊畋聲樂乎昉等頓首謝

雍熙書六韜兵法 平戎陣圖

雍熙四年五月以北虜未服名北面諸將田重進潘

美崔翰及殿前劉延翰對于便殿上訪以禦戎備邊之策延翰曰臣等皆鷹犬之才奉指蹤之命猶懼不給破虜之策惟聖心裁處上因手書六韜兵法將有五才十過之說以賜之庚寅又內出平戎陣圖指畫卷舒進退號令出沒以賜

端拱書急就章

賦

魏丕以黃州刺史來朝召對便坐太宗賜以御書急就章朱邸集 端拱二年七月丙戌以御書急就章藏於祕閣急就章者漢黃門令 史游之所作也帝留心字學先是下詔求前賢墨跡有以鍾繇書急就

章爲獻字多躋駁上親草書一本藏於祕閣仍刻石

分賜近臣

太宗實錄

起居舍人宋惟幹獻御草書

急就章賦太宗命以一軸賜之

淳化祕閣御書 十二部御書

淳化元年七月內降御草書詩十首故實二紙又出御製四十一卷藏於祕閣 太宗嘗書於龍鳳花牋上及統扇上以賜王公近臣嘗出飛白書四字占四幅廣袤數尺先以一幅賜宰臣呂端俄而樞密趙鎔相繼進帝曰昔聞劉洎登床信有之矣上筆法英異學無不成親製真定王

趙普

碑并御八分書篆額多

士稱爲三絕題相國寺及上清宮額筆力精密曉書

法者皆歆服有趙州隆平簿王著

唐相方慶之後

善行草書

興國七年六月甲戌以爲翰林侍書

始置御書院嘗遣中使王仁

睿持御札示著曰未盡善也上臨學益勤又示著著

荅如初久之復示之著曰功至矣非臣所能及仁睿

問其故著曰帝王始學書或驟稱善則不復留心矣

祥符元年二月戊戌真宗語其事以爲善規益

又選趙

七人待詔翰林故有三體書

八分草行

故事六

十三卷兩韻詩十卷草書急就章二卷千字文二卷

孝經一卷賞花釣魚詩一卷雜草書五十三卷飛白

六十九卷八分千文二卷行書祕閣贊三卷五體書

四體書各一卷合二百九卷爲十二部藏祕閣

淳化書紅綾扇 飛白書

淳化元年四月辛亥上親草書飛白書紅綾扇賜宰相樞密使翰林學士尚書丞郎兩省給舍以上各一
三年五月丁酉上親草書紅綾扇賜宰相李昉等各
一五年五月戊寅賜近臣御飛白書各一軸庚辰初
伏上親書紅綾扇賜近臣各一 一本云三年三月甲
午朔文德殿百官入朝上親書綾扇賜近臣李昉等

王元之謝賜御書紅綾扇上草書趙嘏絕句詩表
曰絳綃半幅霞舒舞鵠之紋宸翰三行雲遶回鸞之
勢宮中刀尺翦雲霧於赤城筆下風雷走龍蛇於碧

落堪咲二王非墨妙筆精之作如逢伯禹得金簡玉
字之書。太宗又嘗草書紈扇作古詩賜諸將王昭
遠等言多比諷。又賜何承矩御書前後凡五十餘輔。
又面付手札寵之。又嘗賜戴興以玉篇唐韻御飛白
書三十卷。張洎謝賜八分表曰。念次仲之遺範。采
元帝之名家。古文變體之後。唯此書并大小篆與時
偕行。况仙毫揮洒。體備剛柔。犀利譬長劍之倚天。壯
觀類洪河之紀地。潤澤如春雲之出岫。明媚若曉漢
之橫空。祥符元年二月戊戌。王欽若曰。近日四方
之人工習筆札。由太宗精書翰所致。五代有朝體書。

絕無楷法。今則盡學鍾王歐柳之蹟矣。上口。太宗筆法。復出今古。

淳化新校御書 聖翰讚

淳化二年閏二月戊寅。祕書監李至進新校御書三百八十卷。上從容謂之曰。人之嗜好不可不謹。人君當淡然無欲。勿使嗜好形見於外。則奸佞無自入焉。朕他無所欲。但喜讀書。多見古今成敗。善者從之。不善者改之。至拜舞稱賀。四年閏十月二十四日。右諫議大夫張昉獻聖翰讚。及以行草篆書寫御製詩。詔除史館脩撰。

淳化賜飛白玉堂書 三體書 賜詩

四體書

淳化二年十月辛巳翰林承旨蘇易簡獻續翰林志
二卷詔藏於史館仍賜御書二章以寵之批紙尾云
意美卿居清華之地也又飛白玉堂之署四字以賜
易簡因謂宰相曰易簡告朕求此數字可召至中書
授之他日爲翰林中美事因賜李昉等草書各一幅
作真草行三體凡五十一字

十一月戊午易簡上言

願以上所賜詩刻石上爲真草行三體書各一本命
待詔吳文賞模勒刻石以賜易簡仍以百本分賜近

臣十二月巳卯易簡受詔以上三體書石本遺秘書

監李至等三館學士凡二十五人皆上表稱賀

范杲獻玉

堂記

辛卯易簡於本院會學士韓丕畢士安李至楊徽

之梁周翰柴成務呂佐之錢若水王旦潘謹修王著
呂文仲等觀御飛白玉堂之署四字并三體書詩石
上聞之賜上尊酒大官設盛饌至等各賦詩以紀其
事宰臣李昉等亦有詩易簡編次以聞上謂李昉曰
易簡以卿等詩來上斯足以見儒墨之貴學士之榮
也別錄一本進入因以詩賜易簡其字以素繒書之
徑二尺餘觀之曲盡神妙明道二年八月辛亥詔學

士院以四字刻石。景祐元年五月甲申，學士院上石本。賜待詔以下器幣。至紹聖初，翰林承旨建言，因命撥取玉堂二字，揭之上牌。日錫燕近臣，識者謂不當。以前代殿名皇朝寶札，揭之於臣下止息之地。紹興中，御書玉堂二字，賜周麟之。見後徽宗御書摘文堂書目。天聖四年，錢惟演爲飛白書叙錄一卷。首錄太宗御書帝王名臣飛白，以次編記。又有禁林

宣安會集一卷

淳化草書飛白賜近臣

淳化二年，草書飛白簇賜近臣。上謂之曰：夫欲學書

當須澄神靜慮。具在筆端。方臻其要。飛白近少習者。朕因得一古飛白障子。倣而書之。盡用筆之法。古人書札之妙。上聖之人。有能窮其理。是知筆札至難。

淳化飛白秘閣

淳化三年五月甲寅。詔增脩秘閣。八月壬戌。秘閣成。帝作贊。賜之秘書監。李至上表引顏真卿題放生池碑額。近翰林學承旨蘇易簡乞御飛白玉堂之署。爲比。乞御書新額。以光秘府。翌日戊辰。詔中書樞密院近臣觀新閣。又賜上尊酒。太官供膳。是日遣中使齎御飛白書秘閣二字。以賜李至。李昉等相率稱謝。退。

就宴三館學士預焉又賜御詩以美其事李至上表請以御製刻石詔贊并序朕爲親書并篆額以旌祕府 淳熙九年知福州汝愚得飛白祕閣字碑本於州治止戈堂知寧國府陳騏得御製書贊序碑本於昭亭山上之祕府 如鳳之舞如龍之從如月蔽雲如旂卷風纖而不晦穠而不豐奇古迭出變通不窮

淳化祕閣碑陰書孝經

淳化三年十月癸亥以御書千字文遣中使李懷節付祕閣李至請於御製祕閣贊碑陰摹石上曰千字文蓋梁武得鍾繇書破碑千餘字俾周興嗣次韻而

成非垂世立教之言孝經百行之本朕當躬書勒之
碑陰仍賜至以詔書諭旨 龜飾厥趺龍踠其顏孔
言曾行炳丹青而燦星日

淳化帝王名臣法帖

四年四月先是求先賢墨跡擇其善者爲歷代帝王
名臣法帖十卷命工勒石丙戌賜近臣

詳見小學

帝王法帖始於漢章帝晉武帝書

淳化八分書千字文

淳化四年四月丙戌內出御八分書千字文賜宰臣
李昉以下各一卷 三年九月巳未上草書千字文

賜近臣各一本

淳化書大言賦

淳化四年八月丙辰朔上草書宋王大言賦賜翰林承旨蘇易簡

易簡名近列同觀

因擬宋玉作大言賦

以獻其詞曰皇帝書自龍牋作大言賦賜玉堂臣易簡御筆煌煌聖詞洋洋瓌瑋特達不可備詳因伏而奏曰恨宋玉不與陛下同時帝曰噫何代無人焉卿爲朕言之易簡因爲大言賦曰聖人興兮告成功登崑崙兮展升中上覽賦嘉賞詔褒之

又草書勸酒戒

酒二詩賜之

淳化書印紙

淳化五年五月庚午

十九日

上臨軒親選郭玘等四人

並爲常參官仍給印紙令滿秩日自贖於御前較其課最戊寅上自書一幅曰公務刑政惠愛臨民奉法除奸方可書爲勞績又別書二十餘幅賜大理正尹玘等人一通皆京朝官之選也召知審官院錢若水曰奉法除姦之語恐不曉者因而生事可語之曰除奸之要在乎奉法時被選者二十餘人而知榮州李虛已首預獻詩陳所以感遇之意八月庚寅帝批其紙尾曰虛已學古入官榮親事主奉書爲郡知恩

奉上欲布新規朕已得良二千石矣乃賜五品服命
儒臣閱所批詔兼賜五十萬錢後卞袞通判宣州廉
幹聞亦預焉 四年七月飛白書向敏中張詠姓名
付宰相曰此名臣也已酉並命爲密學 御筆題殿柱
曰真鹽鐵陳恕

雍熙四年三月庚辰詔知州通判

給御前印紙

又見考課

查道通判遂州出御書曆

俾錄其課給以實奉凌策通判定州賜御書歷

淳化賜近臣飛白書

至道

淳化五年五月戊寅賜近臣飛白書各二軸十一月
丙辰賜近臣御飛白書各一軸別賜參政寇準飛白

草書十八軸先是宰相呂蒙正等皆已得賜準出使在外至是始及焉上因謂呂蒙正曰書札者六藝之一也固非帝王之事朕蓋聽政之暇聊以自娛耳至道二年五月丙午上飛白書數幅以示近臣字皆廣袤盈尺先賜宰相呂端一幅侍臣因競前爭取上曰劉洎登床正如此矣六月甲戌上遣使賚飛白書二十軸賜端等人五軸又以四十軸藏於祕閣字皆方圓數尺端等詣便殿稱謝上謂之曰飛白依小草書體與隸書不同朕君臨天下復何事於筆硯乎中心好之不能輕弃歲月既久遂盡其法焉

實錄

暇日召

翰林善書數十輩對便殿課習鍾王雜體

淳化祕閣草書

淳化五年六月己酉命內供奉官盧敏正賚御草書五軸藏祕閣詔史館修撰張泌與三館祕閣學士觀焉

至道書上清宮額

至道元年正月丙辰新作上清宮成御書額以金填其字賜之車駕臨幸謂近臣曰造此祠宇爲民祈福二年五月壬寅相國寺三門成上親書額金填字賜之

至道草書經史故事

至道元年六月戊戌上草書經史故事三十紙詔翰林侍讀呂文仲一一讀之因刻石以數百本并祕閣官吏姓名付內侍裴愈令於江東名山福地道宮佛廟各藏三五本或高逸不仕沌樸有行好古博雅爲州里所稱者分以賜之

會要

先是六月乙酉遣裴

愈往江南求圖籍

淳化五年十一月丁卯令史館

檢討前代宰相舉官故事上因書孫叔敖故事爲一幅以賜呂蒙正蒙正等退而各舉所知祥符二年十月癸巳對輔臣崇政殿出太宗御書故事皆有監

批

太宗御書曲禮

見箴類

咸平龍圖閣太宗御書目錄

見觀書

至道三年六月乙未真宗詔以先帝御書墨跡賜天下名山勝境九月戊寅賜曲阜文宣王廟十一月癸未詔所藏太宗御書委官吏檢校

景德龍圖閣太宗御書

咸平龍圖閣觀

太宗草行飛白書

見觀書類

景德校勘新寫御書

元年三月丁酉直祕閣黃夷簡等上校勘新寫御書
凡二萬四千一百六十二卷賜錢帛有差校勘官劉
等六人授校理先是詔流內銓取選人內及第無
過者以名聞命陳恕楊億試之凡七人於崇文院校
勘太宮供膳踰年乃畢而有是命當入校書類

景德大清樓觀太宗聖製御書

天禧附

四年三月乙巳

七日

召輔臣對於苑中水閣臨池垂釣

又登太清樓命內臣啟局鑰觀太宗聖製御書及新
寫四部羣書上親執目錄令黃門舉其書示之總太

宗聖製詩及故事墨迹三百七十五卷文章九十二卷經庫二千九百十五卷史庫七千二百四十五卷子庫八千五百七十一卷集庫五千三百六十一卷四部書共二萬五千九百九十二卷長編太清樓藏太宗御製及墨迹石本九百三十四卷輯四部羣書二萬三千七百二十五卷與此不同其後羣書增及一萬一千二百九十二卷太宗御集御書又七百五十三卷

祥符太宗御札

祥符三年四月己酉內出太宗御札二十六卷示輔

臣皆上在宮邸時所賜令錄付修國史院六月己亥
內出太宗賜呂端上官正手詔付修國史院

祥符內出太宗御書御製

二年十月癸巳內出太宗聖製歌詩御書故事皆有
鑒戒對輔臣崇政殿西廡示王旦等曰此先帝朱才
人所藏近者上進十一月甲寅遣使以太宗御製御
書各六十二卷賜輔臣人一本皆未嘗盼於外者後
數日又出太宗鏤文紅管筆三年十二月以太宗御
書一百軸賜交州李公蘊從其請也

祥符太宗鏤文紅管筆

祥符二年十一月丁巳丙出太宗鏤文紅管供御筆
十二管分賜王旦以下人一雙因謂王旦等曰先帝
聽政之暇常以觀書及攻筆法爲意每見諸家字體
精妙無不學者舉之必成且等曰先帝筆法英異非
人臣所及如侍書玉著有名於時然望先帝甚遠上
曰著於侍書待詔中善規益亦無其比朕頃在東宮
侍先帝嘗見學鍾繇書或至夜分或自夙興手不釋
筆

會要

祥符國子監御書閣

五年九月辛巳國子監請建閣奉藏太宗御書從之

明年五月辛丑閣有赤光上燭六月己巳閣上梁命
近臣臨觀帝作七言詩賜之又賜二帝御集御書摹
本詔王曾記之

會要祥符七年三月文武百官表

請赴國子監觀太宗御製御書及聖製御書刻石從
之先是帝以太宗御製御書并帝所製祥瑞論勤政
論俗吏辨爲君難爲臣不易論崇儒術論五篇藏于
國子監監之官屬乞建閣以安之又輔臣言乞以聖
製刻石于閣下至是始成因求觀 **長編**七年四月
己巳群臣詣國子監觀太宗御書及新刻御製辯論
遂宴本監 寶軸星繁翠珉玉立 羲爰文辭世異

重熙舜典禹謨事殊繼志

祥符太宗御書法帖 賜筆

五年十一月丙辰內出新編太宗皇帝御集及御書法帖凡十五部總三百三十六卷示輔臣上曰太宗學由天縱屬思援翰必極精妙王旦曰以文章化人成俗由太宗始也五代以來筆札無體鍾王之法幾絕太宗留意翰墨斷行片簡傳之於外則爭求之自是學者書體丕變聖教之至也上曰太宗所用筆亦與人間不同顧向敏中下謂曰卿等未嘗見咸再拜陳乞翌日命賜之人一雙 太宗御草孝經一卷刻

石祕閣法帖十二卷小字法帖一卷古詩一卷做鍾
 繇書一卷草書筆法一卷草書故事急就千文等為
 卷軸三十一八分書故事千文為卷二飛白書為軸
 者七四體書五體書六字各一卷 已上刻石御書院

墨蹟雜書四千八百九十四卷冊御製四千十六卷
 冊古詩故事墨蹟一千六百七十一卷雜書扇百三
 十六刻石雜書八百十八卷御製七百九十三卷古
 詩故事刻石雜書四百五十二軸 分藏於龍圖閣太

清樓祕閣御書院

刻石雜書三百四十七卷七百五

十三軸 賜名山寺觀中外臣僚并兗州文宣王廟

祥符先猷殿太宗皇帝御書 天禧天章

閣御書

祥符八年四月丁卯詔玉清昭應宮奉安太宗御製御書殿名先猷其御製御書殿名繼文

即迎禧迎祥

殿

天禧二年正月壬寅具鈞容清衛樂奉安太宗文集于先猷殿翌日奉御集安于繼文殿五年三月召輔臣觀御書于龍圖閣四月以御書石本爲九十編藏天章閣

祥符景靈宮御書

七年七月二十八日輔臣請御書真遊殿額從之

九年四月丁丑御書景靈宮天興殿保寧閣巳亥有
司奉御書兗州景靈宮太極觀額上作七言詩 紫
殿琳庭琅函綠蘊

一海卷三十三終

玉海卷第三十四

浚儀王應麟伯厚甫

聖文

御書

三朝寶字

胡宿代中書密院謝賜三朝寶字訓鑒圖表神毫英
發繪事昭陳裁決繁機奮耀英斷書鳳紙之尾擗犀
管之英墨寶相輝神鋒迴拔居然鸞鵲之翥蔚有龍
虎之威留聖思於勒成命侍臣而類次形於方版之
鏤參諸設色之明序以宸章置之禁坐

乾興飛白書 天聖賜飛白書

乾興元年三月丙子賜輔臣御飛白書各一軸初上未嘗爲飛白書一日見飛白筆遂取試書其體勢遒勁有如夙習因以分賜焉十二月甲辰親書唐賢詩分賜天聖元年九月戊寅召補臣於崇政殿西廡觀馮元講論語仍賜御飛白書三年四月己未賜輔臣御飛白書人十軸仍刻石賜近臣四年五月庚辰以端午賜輔臣御飛白書羅扇各二中書省樞密五年三月辛酉賜輔臣御飛白書九年閏十月戊辰二十知兗州孫奭辭曲宴大清樓召晁迥與會賜飛白書人一軸

迥與呂夷簡張耆及堯別賜大字四軸 晏殊謝表
曰乾文綺粲睿筆鸞廻文皇鳳字近愧於流芳炎帝
穗書遠慙於逸品宜登冊府永冠書林

天禧中仁宗在東宮賜張士遜十二字曰寅亮天地

弼予一人又曰日新其德

蘇軾爲
頌二篇

又以忠孝字賜士

遜

天聖書古詩 軋興書唐賢詩

見講禮記 見講論語

天聖賜中書樞密飛白扇 皇祐賜飛白

筆法字

見乾興飛白書 皇祐三年十月丁丑飛白書筆法
二字賜講讀官各一軸時趙師民歸青州命就賜之
皇祐以後每歲重午節必賜飛白書扇
夏竦觀飛白有輕素飄吹長烟壘空及戲蝶騰虹之
句帝宸翰道逸筆勢有法飛白尤爲妙筆

天聖賜進士中庸

天聖五年四月辛卯賜進士王堯臣等聞喜宴于瓊
林苑中使賜御詩又人賜御書中庸篇各一軸自後
遂以爲常初上欲賜中庸先命中庸錄本既上乃令
宰臣張知白進讀至修身治人之道必使反復陳之

上傾聽終篇始罷是歲進士三百七十七人 景祐

元年四月乙卯賜新第張唐卿詩及中庸

詩云寒儒逢景運報

德合如何

慶曆二年四月己亥又賜楊寔

皇祐元年

四月戊子馮京御詩及中庸五年四月壬辰賜鄭獬
嘉祐二年四月乙亥賜章衡四年四月戊子賜劉

輝

天聖織成飛白字圖 飛白崇真殿榜

篆碑額

五年九月癸卯召輔臣至崇政殿西廡觀孫奭等講
書賜織成御飛白字圖己酉召輔臣觀御飛白書慈

孝寺崇真殿勝於承明殿崇真殿者真宗神御殿也
十一月戊戌上親篆慈孝寺碑額夏竦撰文宋綬書
慶曆五年十二月庚申以寶相佛閣爲慈尊閣御
飛白書勝賜之

天聖賜進士大學篇

天聖八年四月丙戌賜進士王拱辰宴于瓊林苑遣
中使賜御詩及大學篇各一軸自後登第者必賜儒
行或中庸大學篇 寶元元年四月甲午賜新第人
聞喜宴于瓊林苑賜御詩及大學 慶曆六年四月
丁丑賜賈黯等 嘉祐六年四月丁丑賜新進士王

俊民等同上

天聖龍圖閣天章閣觀三聖御書 賜飛

白

八年八月丁亥召近臣宗室龍圖天章閣觀三聖御書又詔觀瑞穀於元真殿命從臣賦詩賜御飛白書字各一軸遂宴藻珠殿壬辰幸瑞聖園觀刈穀燕從臣

天聖太清樓賜近臣飛白 又見上

九年閏十月二十四日戊辰宴近臣于太清樓

迎陽門內

後苑有太清樓貯四庫書與玉宸殿相望 餞翰林學士孫奭知兗州又召

太子少保致仕晁迥初奭侍講邇英至前世成敗之際未嘗不反覆諷規每至見仁宗必優禮之三請致仕召對承明殿慰諭奭以年老因請泣下上亦惻然詔與馮元講老子三章各賜帛二百疋以不得請求近郡拜工部尚書知兗州

七月癸酉

詔頒宴而行又

留之數月乃特宴太清樓近臣及太子少保晁迥預上作飛白書大字以賜二府而小字賜諸學士獨奭與迥兼賜大小字群臣卽席賦詩又別出禁中珍器寵賁之翌日奭入謝又命講老子賜襲衣金帶鞍馬及行

十一月
癸未

賜宴瑞聖園上旣賜詩又詔近臣皆賦

詩送之 至和中書待詔李唐卿撰飛白三百點以
進自謂窮盡物象上乃特爲清淨二字賜之其六點
尤奇絕 皇祐二年雲臺觀道士元亨進歌詩三篇
帝屬以詩又飛白清淨字賜之 劉子儀建閣藏所
賜書上爲飛白書曰眞宗聖文祕奉之閣

景祐篆律準

見律類

御書慶基殿

景祐二年二月戊寅御書奉先院宣祖神御殿榜爲
慶基殿 仁皇下議樂之詔以考鍾石之和置寫書
之官以綴經墳之學

寶元紫微閣御篆

寶元元年七月庚戌作舍人院閣上親篆其榜曰紫
微閣以賜之 夏竦詩曰右省層楹建西清寶字宣
神明遠藻畫法象出奎躔 元祐中劉攽請復建紫
微閣于西 慶元五年御書

寶元賜輔臣飛白書

二年十一月二日巳丑遣內侍就輔臣第賜御飛白
書各一軸次日輔臣張士遜等入謝奏曰陛下萬機
之煩翰墨不倦神筆奇奧曠古未有上曰朕聽政之
暇無所用心以此自娛耳

康定賜翰林飛白書

康定二年六月二十八日以飛白文詞字賜翰林侍
讀李淑淑出守許州爲飛白寶章記摹石州屨 至
和元年九月王洙爲學士仁宗嘗以塗金龍水牋爲
飛白詞林二字賜之

慶曆寶奎殿御書 摹太宗御書

大相國寺額太宗御書也

至道元年五月重修大相國寺廣殿庭門廊樓閣凡

四百五十五區御題額

慶曆元年八月甲申上謂輔臣曰近初

一小殿禁中而有司過爲侈麗不欲毀其成功今大
相國寺方營殿藏太宗親書寺額可遷置之呂夷簡
因言陛下孝以奉先儉以率下聖人之盛德也二年

正月辛未詔以大相國寺新修太宗御書殿爲寶奎殿摹太宗御書寺額于石上飛白題之命宰臣呂夷簡撰記章得象篆額樞密使晏殊撰御飛白書記翻結字液金填畫騰虬龍於螭首潤雲霧於翠珉二月庚寅又以鍼灸圖石壁堂爲仁濟殿 前是咸平六月甲辰車駕幸五年名後閣曰資聖

慶曆邇英閣御書 荅邇英聖問

四年三月己卯上御邇英閣出御書十三軸凡三十
五事一日遵祖宗之訓二日奉真考之業三日念祖宗艱難四日思祖宗愛民五日守信義六日不巧詐

七日親碩學八日精六藝九日謹言語十日敬耆老
十一日崇靜退十二日求忠正十三日懼貴驕十四
日保勇將十五日尚儒術十六日議釋老十七日重
良臣十八日廣視聽十九日功無迹二十日戒喜怒
二十一日明功媚二十二日杜希旨二十三日從民
欲二十四日謹滿盈二十五日傷暴露二十六日哀
鰥寡二十七日訪屠釣二十八日講遠圖二十九日
絕朋比三十日斥諂佞三十一日察小忠三十二日
監迎合三十三日約已爲民三十四日損躬撫軍三
十五日求善使過又出危竿論一篇述居高謹危之

意顧侍臣丁度等曰朕取臣僚上書及進對事目有
可施於政治者書以分賜卿等度暨侍講曾公亮楊
安國王洙等既拜賜因請注釋其義上許之丙戌丁

度等上答邇英聖問一卷卽所注釋三十五事也

志儒

家

丁度傳有邇英聖覽十卷

其序曰伏奉宣示御書十三軸仰窺

聖旨皆陛下上念祖宗下思政治述安危成敗忠邪
善惡之事詢謀下臣使進裨補敢不竭愚切思自古
求治之主靡不欲興理道安邦國納忠直退奸邪廣
聰明成功業然行此數者在明與威斷耳明則不惑
威則善柄斷則能行總是三者守而勿失非聖人孰

能爲之臣等嘗讀唐書見憲宗英悟留心庶政宰臣
陳說政事必反覆詰問旣盡其理則曰凡事言之則
易行之則難卿等旣爲朕言則當行之勿空陳而已
李絳對曰非知之艱行之惟艱天下之人從陛下之
所行不從陛下之所言惟願每言則必行之憲宗深
所嘉納今臣等親承聖諭敷明治要亦願陛下日與
輔臣舉此事目推而行之毋使唐之君臣專美前代
也上覽之終篇指其中體大者六事付中書樞密令
奉行之景祐二年正月癸丑置邇英延義二閣

元祐六年三月一日

庚申朔

御邇英閣呂大防奏曰仁

宗所書三十六事禁中有否上曰有大防請圖寫置坐隅以備親覽從之大防又言危竿論一事在三十
五事之前 仁宗進用大臣欲更天下之治數開延閣以訪先務又降神翰以督施爲

慶曆崇政殿賜飛白書

仁宗御崇政殿策賢良方正太常博士錢彥遠等

實錄慶曆六年八月癸亥策試賢良并試武舉賜宰臣賈昌朝等洎從臣御飛白書人一幅

一云彥遠上所對策命宰相讀之因有是賜

知河中府錢晦入

辭上以錢氏自鏐已來世効臣順問其家傳鐵券塢

并三朝御書以進皆親識其未還之因戒以陝西民
因爲朕愛撫飛白安民二字以賜 皇姪宗望獻所
爲文賜全監書又以金泥文羅御書好學樂善字賜
之第中建御書閣上爲題其榜 年月未詳 書博學
二字賜翰林學士楊億

慶曆崇政殿觀御書 延和殿觀御書

六年八月丙寅御崇政殿召近臣觀御書八年九月
己亥御延和殿召輔臣觀御書

慶曆飛白開先殿榜

六年八月乙亥太平興國寺重修太祖神御開先殿

成上飛白書勝十月巳酉奉安太祖御容庚戌酌獻

慶曆飛白端敏二字 文儒字

慶曆中仁宗以飛白端敏二字飛白筆一賜太子太

傅王舉正

蘇軾記之又見後

八年三月書文儒二字賜學

士張方平

慶曆中

盛夏

飛白書團扇爲和平字賜

趙師民

賜遼使劉六符飛白書八字曰南北兩朝

求通和好

飛白書博學二字賜侍讀學士張錫

飛白直清二字賜任布

飛白帝筆二字賜向傳

範

飛白千歲字賜太傅張士遜士遜進歌一章二

年八月

清忠二字賜王德用

以塗金紋羅書曰

李昭亮親賢勲舊以賜 晏殊得龜龍二字 紹興
六年十一月二十五日王洙孫楚老上慶曆皇祐御
札手詔飛白賜銀帛百

皇祐飛白天性字

皇祐元年三月十五日飛白天性字賜端明殿學士
李淑時帝以御書賜近臣淑方侍養遣使就第賜之
三年三月丁丑飛白書賜講讀官各一軸 皇祐以後
重午必賜飛白書扇

楚建中得飛白帝字

皇祐篆明堂

二年九月二十一日乙巳上將祀明堂太常禮院言

大慶殿爲明堂卽明堂及門當爲殿榜如黑繒金書爲明堂字殿門榜加朱繒黑字爲明堂之門四字於禮爲便上謂輔臣曰二榜當親書是日上於禁中服靴袍篆明堂二字飛白明堂之門四字自晝逮夜半而畢詔宣示群臣榜于門大享禮畢藏宗正寺又詔模刻二榜爲副本頒于二府及近侍被錫者皆謂不世之遇中外榮之

長編九月庚子揭御篆飛白

歸

田錄明堂額御篆以金填字門牌亦御飛白神翰雄偉勢若飛動餘詩云寶墨飛雲動金文耀日晶謂二

牌也

歐陽修所作

元絳詩曰堯章粲雲漢義畫露

乾坤日字光芒動奎鈞氣象溫
紹興元年九月十一日進士黃朝美上仁宗御書明堂牌碑本詔藏於
祕府壬寅進呈上曰已別書六字

皇祐篆牌額

皇祐中王子融以唐明皇所題裴耀卿碑額上進仁
宗遂賜其兄曾碑曰旌賢又親篆寇準碑曰旌忠自
王曾至程琳賜碑額者二十二人 英宗二人賈昌
朝宋庠 神宗五人韓琦至曾公亮 哲宗二人富
弼司馬光 徽宗二人 欽宗一人

篆鳳延鸞珍圖秘刻

皇祐賜飛白

五年九月甲戌皇姪宗懿上飛白大字十軸初宗懿進飛白書上賜更切進學飛白四字至是再上之

皇祐書銅鼎鸞刀

五年九月戊寅鑄鼎十有二天地圓丘用五宗廟用七又作鸞刀郊廟各一先是賈昌朝侍經筵帝問鼎卦聖人亨以享上帝今郊何以無鼎遂命阮逸胡爰鑄銅鼎制鸞刀帝親書鼎名曰牛鼎羊鼎豕鼎皆書而刻之鸞刀亦親書刀名而書之有司皆篆刻其下

劉敞獻律鍾鼎鸞刀銘四章 世準進鼎頌

至和寶章閣兩朝御書 嘉祐迎陽門觀

御書

至和初五臺山真容院修殿藏太宗真宗御書二年
二月丙申賜名寶章閣嘉祐二年六月癸亥御迎陽
門召迎臣觀御書五臺真容院寶章閣榜三年七月
二十四日壬辰御迎陽門召宰臣以下觀御書妙法
正覺殿額次赴天章閣觀御書

至和飛白書

至和二年二月辛丑召近臣觀飛白鳳翔上清宮榜

于迎陽門 嘉祐四年正月上賜近臣墨字以稽古

二字賜劉敞 聖帝之揮千奇萬巧 親作飛白侍

臣縱觀心合造化生成筆端書幅踰百大均寵放

仁宗遣使賜賈昌朝三聖御書凡百八十七軸 陳

師道仁宗御書後序神文好飛白書時一爲之以後

其好將相宗戚家有藏焉會法而忘世會理而忘法

所謂有其道而進於技者王者之於藝蓋如此 仁

宗賜文彥博御書元豐六年十二月二十九日彥博

言以卷軸甚大建閣奉安 仁宗作飛白書荅契丹

宗真 蔡襄知開封賜以御書 賜允弼飛白二字

宗室從古善書仁宗屢以御詩及飛白賜之 叔
魚好學飛白好學字賜之 又賜宗懿御飛白十一
輔

嘉祐御書文宣王廟榜

見觀御書門 御篆文宣王廟門并殿牌張師中進
奎文光魯頌六年三月乙酉召輔臣觀之命內侍劉
溫良賁往兗州

嘉祐寶文閣飛白書 龍圖天章閣觀三

聖御書

嘉祐七年十二月丙申 王珪序 幸龍圖天章閣召輔
云戊申

臣侍從諫官御史管軍臣僚觀三聖御書又幸寶文閣親爲飛白書群臣搢笏以觀命學士王珪各題歲月及所賜臣僚名又出御製觀書詩賜韓琦以下令屬和以進遂宴群玉殿復詔珪撰詩序刻石寶文閣序云十二月戊申紀云丙申乘暇日延群臣觀三聖神翰于龍天章閣玩心文明藻思濬發遂賦觀書之詩又幸寶文閣親爲飛白書使左右縱觀驚鸞翥鳳與夫烟雲布濩之象莫不回薄于筆下蓋天縱之能世莫得以曾闕也因分賜從臣臣琦等二十八人廣宸唱以進云云壬子紀云庚子再召觀方國頊所上瑞物其木

石皆有文又陳先朝述作之文復燕群玉殿出禁中

肴醴芳花異香瑰奇未見之物

一云庚子再會天章閣觀瑞物復燕群玉

賜禁中花全盤香藥

八年十二月乙亥英宗詔以仁宗御書藏

寶文閣命珪撰記立石治平三年九月丙辰幸天章

寶文閣命兩府觀珪所書仁宗御詩石刻名珪面授

端明學士

仁宗治蹟之懿與天地同功原其本以德爲元氣然

後揭政令而日月之濡利澤而雨露之萃人材而淵

嶽之至其心術之妙形於筆墨則又星斗爛而雲漢

倬也今奎畫垂耀後世金石之刻惟飛白爲多此非

獨天縱之能蓋胷中之所經緯筆下之所卷舒見於
治道皆一理爾觀宸札之運也騁而安迅而紆婉而
勁揚之者若翔抑之者若墜放之欲周乎八極之表
歛之靡失於一毫之間則凡所以綱紀庶務斡旋至
化實乎此焉見之

嘉祐手札

七年八月丙子上謂輔臣曰皇姪少養于宮中欲以
爲皇子續有親書手札付外是日降手令中書審院
翌日進呈丁丑召學士王珪草詔頒天下戊寅珪對
于崇政殿上諭曰朕懷已邇詔日立愛之道自

親者始其以爲皇子

皇祐中僧懷璉名對化成殿親書頌詩賜之凡十有七篇璉建閣曰宸奎軾銘曰咨示東南山君海王時節來朝以謹其藏嘉祐中英宗龍潛藩邸賜記室周秉手書蘓軾爲頌曰雲漢之章融爲甘露結爲慶雲融而不晞結而不散以燾冒其子孫

治平孝嚴殿御篆

治平元年十二月九日巳亥英宗名輔臣觀御篆孝

嚴殿額于迎陽門

殿在景靈宮西南

遂御延和殿賜茶二年

四月丙午奉安仁宗御容親酌獻

御篆賈昌朝碑

曰大儒元老之碑

治平賜韓琦手札

四年十一月丙戌

日十二

命韓琦判永興兼陝府西路

經畧安撫使賜手札趣令治裝并封示蔡挺李肅之所奏事故事節度使辭賜窄衣束帶甲馬上以琦再世宰輔位處三公特賜對衣笏頭帶鞍轡馬仍令常服引對熙寧元年十二月手詔賜琦曰大名爲天下喉襟欲除卿乙丑琦判大名復降手詔聽便宜從事沈括帥郵延承密詔至二百七十三道

胡宿有名赴天章寶文閣賜御書飛白扇詩珍幽開

二典聖藻煥重離白鳳隨毫舉蒼龍應墨奇 御書
四民安康字賜司馬光

熙寧書英德殿

元年十月二十三日名輔臣觀御書英德殿牌子迎
陽門元豐五年九月二十七日御崇政殿召輔臣觀
景靈宮御書十一殿榜

元祐書唐人詩

二年九月十五日講論語終篇賜宰臣執政經筵官
宴于東宮上親書唐人詩分賜之 五年九月二十
一日壬午御邇英閣召講讀官講書讀寶訓賜御書

詩一首上親書姓名於後 蘇軾得唐人紫薇花詩
一篇至有驪珠三十四一日傳萬口之語

元祐神宗御筆

六年十月四日三省進神宗御筆七十五策

陳師道詩睿思殿裏春夜半自書細字荅邊臣萬里
風煙入長筭

政和書五禮序 大成殿

元年三月一日議禮局請以御書政和新修五禮序
摹勒立石於大常寺從之五年十月二十九日御書
摘文堂榜賜學士院以學士強淵明遷承旨上爲增

廣直廬書榜寵之七年國子監辟廳御書大成殿榜
宣和四年三月五日幸秘書省宣示御書千文十
體書洛神賦行草近詩

建炎書通鑑

書坐右屏

詳見後

書郭

子儀傳

詳見賜書

建炎二年九月十七日戊戌上書資治通鑑第四冊
賜黃潛善已亥宰臣謝上曰近將語孟治道處手寫
入於絹屏又曰語孟誦習之熟真有可喜
聖政云孟
子論治道
處
二十二日癸卯內出親書坐右素屏放葵一篇大
有大蓄二卦與孟子之言七凡十扇遣中使宣示宰

三石四十九
執四年八月戊寅上手寫郭子儀傳付范宗尹示諸
將韓世忠等 三年七月癸未書忠勇字表韓世忠
旂幟 紹興三年表岳飛旗曰精忠

紹興書趙克國傳 寫孝經詩書篇章

元年十月書趙克國傳賜呂頤浩以下宰臣乞以墨
本賜中外 二年八月十六日癸卯上出所寫孝經
詩書篇章宣示宰執上曰朕詹仰古聖王之治以爲
規戒 六年六月丁巳論營田上曰昨在會稽嘗寫
趙克國傳賜諸將

紹興書光武紀

二年十二月丁酉諫議大夫徐俯入對俯嘗勸帝熟讀漢光武紀上書以賜之曰朕思讀之十過未若書一編之爲愈先以一卷賜卿欲知朕不廢卿言耳

紹興賜吳玠親筆

四年四月庚辰朔制授玠定國節川陝宣副上賜以所御戰袍器甲且賜親筆曰朕恨阻遠不得拊卿之背也

紹興書無逸圖

見圖類

紹興書尚書 中庸篇

五年九月二十日庚寅賜趙鼎御書尚書一部翌日

鼎奏謝上曰尚書所載君臣相戒敕之言所以賜卿

欲共由此道以成治功九月己丑賜新及第王應辰

以下御書石刻中庸篇廷試畢賜御書自此始一云十月

四月賜之十年五月十六日御書中庸賜秦檜書義

之樂毅論賜韓侂胄

紹興賜親筆詔書

五年七月壬午賜觀文大學士李綱親筆詔書獎大諭

綱應詔陳三策又上六條故有是賜

紹興書車攻詩 羊祜傳 真草孝經

五年十月三日壬寅書車攻詩賜宰臣趙鼎等翌日
癸卯宣諭曰朕觀鴻鴈車攻乃宣王中興之詩當與
卿等夙夜勉勵修政事攘夷狄鼎曰陛下游戲翰墨
之間亦不忘恢復臣等敢不自勉謝表曰宵雅肄三
帝書第一

漢武帝以出車
之詠獎衛青

七年九月戊寅

二十
三日賜御

書秦檜羊祐傳沈與求車攻詩呂頤浩樂毅論向子
諲孝經蘭亭記二十六日樞密使秦檜言乞以賜臣
御書羊祐列傳付有司刊石以墨本頒宰執大將侍
從從之 九年六月辛丑書孝經賜秦檜十三日庚

戌

一云
辛酉

秦檜乞以上所賜御書真草孝經刻之金石

以翼扶世教上曰十八章乃聖人精微之學從之

十三年頒御書孝經周官中庸羊祜傳于天下州學

十四年七月辛未詔諸州以御書孝經刊石

紹興書周易否泰卦

詳見易類

書裴度

傳

五年十月庚戌右相張浚入見上親書周易否泰卦
賜之六年二月浚視師御書裴度傳賜之

紹興書裴度傳

六年賜右相張浚 是歲又書蕪林二字賜兩浙漕

向子諲

紹興書大成殿榜

六年十一月壬辰上書大成殿榜賜成都府學用教授范仲爰請也學殿建于東漢之初平漢人以大隸記修築歲月刻于東楹至今九百四十三年天下棟宇之古無過于此

高宗皇帝雲章奎畫昭回于天爰自飛龍之初頗喜黃庭堅體格後又采米芾已而皆置不用顯意義獻父子手追心慕曾不數年直與之齊驅並轡 紹興五年八月癸亥策士御書策問

紹興書蘭亭叙

三海卷三四
三
七百二十
七年十二月十一日論輔臣曰劉光世喜書前日來乞朕所臨蘭亭叙亦以一本賜之因論書法甚詳遂及法帖曰其間甚有可議如古帝王帖中有漢章帝千文千文是梁周興嗣所作何緣章帝書之舉此一事其它可知豈不誤後學者

高宗大書忠正德文賜趙鼎 紹興中臨王羲之所書樂毅論賜樞臣韓侂胄 周必大貳大政入謝德壽殿御賜書千文

紹興天章寺書

九年二月十二日詔紹興府天章寺

寺卽蘭亭也

祖宗御

書今守臣取進先是建炎四年巡幸江浙御書凡五百五十卷軸悉留于越至是詔取焉

紹興祕閣右文殿書

堯閣類

紹興御書玉冊

十年御書太后玉冊上日學書必以鍾王爲法然後出入變化自成一家十二月十二日行冊禮

紹興書左氏史記 御書石經

十三年二月內出御書左氏春秋及史記列傳於祕書省宣示館職觀畢皆作詩以進是年六月內出御

書周易九月四日御書尚書終篇刊石頒諸州學十

一月丁卯宣示從臣

聖政十三年十一月丙辰宰臣奏昨日付出御書尚書字法高

古十四年正月出御書尚書十月出御書毛詩十六

年五月又出御書春秋左傳皆祕省宣示館職觀畢
進詩上又書論語孟子皆刊石立于太學首善閣及
大成殿後三禮堂之廊廡

紹興書宣聖殿榜

玉冊

親札詔書

唐文

皇帖

十三年七月賜御書宣聖殿及門榜並曰大成

六年賜成

都學御書大成殿額

御書閣曰首善癸未奉安文宣王二十六

年閏十月二十七日書玉牒殿并殿門及祖宗屬籍
堂榜 二十九年七月二十四日乙巳右僕射湯思
退等言恭觀六月十四日丁酉戒諭崇清白止賂遺
詔書親札雲章奎畫超古冠今上曰朕頗留意翰墨
至今不倦在唐惟太宗好二王書士大夫翕然相尚
如歐虞褚薛皆有可觀朕有舊藏文皇數帖其間有
好譏自牧上畏天下畏群臣等語不惟字畫可喜其
用心可爲後世矜式思退請以御書刊石政事堂以
墨本頒中外臣僚使出入觀省詔可

繫年錄云乞以
上親書戒驕情

禁賂遺二詔
立石尚書省

康熙二十六年刊

玉海卷三十四

三

紹興書乾卦 御書玉堂

十四年六月十四日上書乾卦賜龍圖學士秦梓
三十年五月辛巳上以玉堂二字親灑宸翰賜翰苑
周麟之請依淳化故事就都堂宣示宰執刻石分賜
館閣官詔可俟中祕暴書俾侍從館閣官咸得觀仰
仍以石本分賜

紹興宸翰扇

元年四月九日上親書扇賜講讀官王絢胡直孺汪
藻胡交修等皆寫杜詩十四年七月二十七日以宸
翰扇賜祕書少監游操 孫覲爲直孺作御書扇銘

日扇出尚方寶墨未乾天縱墨妙死若龍鸞壁月煌
煌光燭蔀室子孫視之稽古之力

紹興書儒行 大學 臯陶謨 學記

經解等篇 賜進士

五年 乙卯 九月賜汪應辰以下御書石刻中庸篇廷

試畢賜御書自此始 又見前 十二年 壬戌 賜陳誠之周

官十八年 戊辰 六月三日御書儒行篇賜進士王佐

等二十一年 辛未 五月賜趙達等大學二十四年 甲

賜張孝祥等臯陶謨 十七年 丁丑 賜王十朋等

學記三十年 庚辰 四月賜梁克家等經解篇皆就聞

善宴日賜之舉故事也

紹興淳熙御書明堂

見後

紹興十二年十二月庚辰上曰朕一無所好惟閱書
作字自然無勅尚書史記孟子俱寫畢尚書寫兩過
左傳亦節一本

高宗斷鼇立極息馬論道緝熙光明之學追媿三五
倬彼雲漢敷賁石經龍畫螺書旁分徧刻大關造化
細及庶務垂則于億萬世

隆興御書詩

隆興元年十月十四日詔金山寺御製御書詩刊石
進碑本從浙漕朱夏卿請也 九年四月二十八日
書荔枝賦賜閣門舍人張延年

隆興書聖主得賢臣頌

元年十二月二十二日拜張浚左僕射都督如故禮
貌甚隆書此以賜 孝宗初政御書王褒聖主得賢
臣頌李德裕英傑論賜史浩

乾道書閣榜

乾道元年二月三日書風雲慶會之閣賜楊存中淳
熙十一年四月九日書明良慶會之閣賜史浩 建閣

奉兩朝所賜御書

理宗御書輔德明謨之閣賜鄭

清之懋德太勲之閣賜賈似道

乾道跋太上御書

元年十二月劉堯仁進父光世紹興間太上皇帝臨
寫王羲之蘭亭脩禊序

紹興七年十月賜光世

御製跋三年三

月十四日御跋太上皇帝御書聖主得賢臣頌賜宰
臣虞允文淳熙八年八月八日御筆賜王希呂等宜
盡忠極言

乾道選德殿親札

七年十二月辛酉詔僕射之名不正欲採周漢舊制

改左右丞相明年八年二月乙巳降詔庚戌八日宣

詞臣周必大入選德殿上袖出親札云比來一二大臣同心輔政夙夜匪懈漸革苟且之風以副綜覈之意虞允文可特進左丞相梁克家可正奉大夫右丞相御前設小案用牙尺壓紙一幅傍有漆匣歛研寘筆墨於玉格必大書除目進呈自複道秉燭鎖院七年二月七日壬子御選德殿以立皇太子御札宣示大臣允文等奏元良天下大本陛下獨出睿斷爲天下得人各再拜賀癸丑宣詔出麻制丁酉受冊淳熙十四年十一月己亥手詔皇太子可令參決庶

務十五年陳康伯家以紹興傳位親札來上十二月
壬申遣中使密持賜宰臣必大

乾道書政論

六年八月二十八日

孝宗臨御之九年

御書漢議郎崔寔政

論賜宰臣虞允文等允文書于下方曰寔所謂師五
帝式三王弃苟全之政蹈稽古之蹤此聖學之所緝
熙特稷契之佐伊呂之輔未如卒章所云臣所甚懼
也惟陛下選建其人極于三五之隆

乾道御書詩 草書

七年正月八日癸未御書郭熙秋山平遠詩賜宰臣

虞允文等十一日丙戌賜左相允文養生論右相臣克家長笛賦皆太上真書又賜克家御草書古栢行一軸二月御書孫綽天台賦賜夏執中虞允文曰見石墀上皆陛下草聖筆力天縱有風動之狀

乾道跋太上真行草書 淳熙宣示宸翰

乾道七年

辛卯

春以太上皇帝真行草書十卷示宰

臣朱玉高唐賦傅毅舞賦陸機文賦嵇康琴賦曹植

洛神賦王粲登樓賦史節故事段陳羽古意詩蘇軾

養生論周興嗣千字文

三月二日御跋曰竊惟書法

自東漢迄晉唐代有名家然莫不祖述鍾張憲章義

獻而各得一偏未有超軼拔乎其萃者光堯皇帝高蹈羲皇之上游戲翰墨之間初若無意而筆力所到自得之妙集乎大成如春雲行空千狀萬態固知天縱之能心與神會非衆庶曲學之所可及也淳熙二年三月四日葉衡奏謝宣示太上宸翰十軸令臣閱畢可飲卮酒以慶榮遇仍宣示執政侍從臺諫以其書付祕省臣欲置酒都省與執政而下侈非常之賜參政臣茂良等奏此藏在御府群臣無繇見者上曰太上於翰墨間益是天縱非學力所到鍾王輩不足道翌日拜謝乞勒石率與觀臣僚奉表稱謝從之上

曰當以表轉于德壽宮 十一年四月二十四日以
光堯宸翰洛神賦雪賦驄馬行千文臨獻之帖五帖
賜史浩

紹興十二年十一月十五日貴妃吳氏題御書云機
政之暇擇鍾王而下三十帖親御毫素並加臨寫龍
螭鳳翥變態萬象希世之偉蹟也 高宗翰墨志曰
自晉魏以來至六朝筆法無不臨摹

乾道書益稷篇 淳熙書旅獒 賜進士

八年 壬辰 四月己未 二十日 賜進士黃定等御書益稷

篇先是二十日宣示輔臣梁克家奏益稷首載治水

三子七十四
播食事未載君臣更相訓敕之意學者因宸翰味經
旨必知古人用心矣上曰如無若丹朱傲等語見古
者君臣警戒之深又曰聖人待天下之人先之以教
及不格則以刑威之 淳熙五年 戊戌 四月二十四
日御書旅葵篇賜進士姚穎等

乾道欽宗御書 三朝御書

七年九月二十一日吳敏孫楠進一百軸十月二十
二日劉愈進二軸八年七月十二日毛奎孫勸進十
軸毛勒進一百軸九年二月二日陳過庭孫述進十
四軸張伯成進詔旨一軸程邵進御筆八十八軸及

東宮書詩賦各一軸並欽宗伯成又進三朝御書十

三軸

深曾孫

大觀四年六月乙亥張商英為右僕射久旱是夕大雨
華亦不見上親書商霖一尺字賜之

乾道書魏證語

七年

辛卯

八月六日戊申上召吏部侍郎王之奇詹

事陳良翰禮部侍郎周必大同對選德殿賜坐從容
訪以治道久之袖出御筆一通首以魏證答唐太宗
德仁功利之問而繼書其後曰朕即位十年功則未
能有成至於安養黎元俾遂生業正今日急務卿各

極陳其當否若夫仁德帝王之高致朕亦不敢自居方以魏證之言為龜鑑耳之竒等退詣政事堂以所被御筆示宰執丙辰後殿奏事上以問大臣右相震允文奏四者當兼修並用然德仁之責在已功利之責在人不可不察於是良翰等皆奏疏庚申上復以三從官奏牘示輔臣允文復奏今日之務莫急於論相云云

淳熙書七德舞

又見鸞類

御書扇

元年五月一日書唐元稹牡丹詩扇賜吳琚六月一日書劉禹錫詩賜張子仁五年五月十五日書楊傑

二軒記賜子仁十一月二十五日書白居易七德舞
賜翰林學士周必大六年五月十五日御書梅詩賜
步帥岳建壽御書扇賜殿帥郭棣

淳熙太上皇帝御書

三年九月十五日太上書白居易大巧若拙賦賜夏
執中五年三月七日太上書陸機文賦及團扇等賜
工部侍郎趙礪老四月一日又賜王元之待漏院記
并御書扇

淳熙書杜牧戰論 賜皇太子詩

三年十一月一日御書杜牧戰論賜皇太子又御書

詩賜皇太子嗣濮王士輅未陽郡王居廣各一軸

六年五月一日書蘇轍北狄論并御書扇賜工部侍

郎吳淵御書二十八將傳論賜蕭燧

淳熙製秋雨詩

四年八月四日東宮講畢袖出御製新秋雨過書懷

詩一篇六日又蒙送示和章詞翰雙絕

周必大集

淳熙書舊學

五年四月書舊學二字賜史浩十四年再賜史浩以

舊學字

淳熙摹祕閣累朝御書

八年二月三月云二十四日詔祕書省摹祕閣所藏累朝御書刻石從少監趙汝愚之請也凡御書法帖十卷五十六段十一年七月少監沈揆等進呈并以飛白祕閣字及贊序刻石十二年三月以名賢墨蹟摹刻十三年七月畢 十三年四月二日朱震之孫繼先進所賜兩朝宸翰十月二日學士洪邁進欽宗宸翰石刻付史館 十四年八月趙子崧之孫進太上賜書 十五年五月王似之子進太上獎諭宸翰石刻一冊十月陳康伯之孫進高宗所賜詔書 十六年正月書歐陽修琅琊山詩三首賜吳琚

淳熙書蘇軾蘇轍詩

七年十二月十五日書蘇軾蟠龍寺詩賜步帥岳建
壽十七日書軾和雪詩賜殿帥郭棣八年閏月既望
以御書蘇軾四詩賜范成大十五年十二月又賜損
齋所書蘇轍詩二軸是月辛卯書石湖二字賜成大
成大跋云天縱聖能游藝超絕典則高古如伏羲畫
體勢奇逸如神禹碑又跋云跳龍卧虎之勢漏屋畫
沙之迹皆神動天隨沕穆無間譬猶叶氣緗縕蒸爲
雲漢輝光所麗自成文章非復世間筆墨畦逕所能
擬議

八畫野處二字賜洪遵

十年三月二十六日

書三都賦序賜工部尚書知臨安王佐

淳熙書詩賦 製春書詩

十二年九月癸巳洪邁直禁林賜宸翰唐白居易詩
二首十三年三月乙未復召對賜之酒殺出御製春
書即事絕句并以所書蘇軾一詩爲寵越九日甲辰
邁進詩四月辛亥天筆俯和十四年四月乙亥邁召

對清華於御榻之右取宸翰宋鮑照舞鶴賦一軸賜

之邁又謂雲漢昭回之妙得之自然神摹心造自古帝王
名能書者所不能窺測萬分之一自然神摹心造自古帝王

實一章之傳天下誦以爲訓孝宗筆法之妙明堂嚴宗

之祀之恭經閣崇奎章之奉賜書楮進士之訓詩篇侈臣工
之榮鉤珥昭十四年會慶節書心經於禁中觀堂

書超冠八法
嘉靖乙卯年
三

淳熙御筆掌記

上勤勞萬機每臨朝以方寸紙作掌記微偃兩旁而中摺之寘在御手若內殿則留香案上三省密院各奏事畢即視所記一一宣諭已乃收之率以爲常淳熙十一年八月七日後殿坐親以此紙授樞臣周必大蓋陳有功顯大舉趙善淵三人姓名玉音云此是去年臣僚薦可奉使接送伴副使者卿選擇誰可

慶元光宗御筆

二年五月十一日詔詳定官許及之編次太上領尹日御筆爲七十一冊總目一冊御筆六十五軸兵籍

一册十一月十一日與寬恤詔令同進

嘉定祕閣御製御札目錄

祕閣藏御製御札六百七軸三十五册五道續藏六百五十二軸十一册掛屏扇面九十有九嘉定三年編次爲目錄藏之後張守孫拭上高宗御札二幅十月附于目錄後 嘉泰元年御書書之說命易之泰詩之天保以賜輔臣

慶元進太上皇帝領尹判押案牘 又見上

二年十一月十五日上詣壽康宮恭進聖安壽仁太上皇帝領尹御筆判押案牘共七十一卷 禮存謙

下晉嘗紀於批牋事美英明漢亦崇於辨牘龍筋絢
藻鳳尾摛華俾雲漢之爲章比春秋之決事 景祐
三年二月甲子命崇政殿說書賈昌朝王宗道同編
次太宗尹京日押字時范仲淹權知開封府上太宗
所判案牘故命編次四年十一月成書凡七百一十
卷

端平御書張九齡進金鏡事

二年正月丙辰賜學士真德秀先是德秀論致壽之
道五無逸親賢以孝奉先仁有德則壽

淳祐御書大學三銘

元年讀仁皇訓典終篇親御奎章以記禮大學張載
西銘呂大臨克己銘程顥顏樂亭銘分賜輔臣 西
銘明理一而分殊推親親之厚以大無我之公因事
親之誠以明事天之道推人以知天卽近以明遠

晏殊飛白書賦

昔在軒后旁羅俊英乃有蒼頡思周神明下侔羽族
之迹上法奎園之精始造古文播於寰瀛爰及東漢
紀年熹平其臣蔡邕譽聞帝庭矚鴻都之藏役掃堊
帚而字成寓物增華窮幽洞靈肇此一體用飛白而
爲名飾宮闕之題署助聖賢之藝能厥後累朝之臣

習此奇蹟代百名系存乎簡籍然猶獻之白而不飛
子雲飛而不自伊唐二葉迨及高宗咸所留意亦云
盡工分賜宰弼渙揚古風若乃宮硯沉碧山鑪泛清
恣冲襟之悅穆拂神翰以縱橫空濛蟬翼之狀宛轉
蚪驂之形爛皎月而霞薄颺珍林而霧輕曳彩綃兮
泉客之府列織綺兮夏王之庭仙風助其縹渺辰象
供其粹凝信一人之妙用非末學之能稱而况取象
八分資妍小篆玉潔冰潤龍驤虎變合心手以冥運
體乾坤之壯觀又真宗御飛白記曰銀鈎婉潤蟬翼
輕濃山如礪而不泯字生金而增寶又御飛白書

扇賦驚思三雲灑迴春之藻翰成變楷之奇文婉繞
無方輕濃有制該筆苑之道潤集書林之妍媚標王
字於日中湛金波於月際六藝之逸品在昔正觀之
隆文皇念功時則有無忌師道沐鸞蚪之班詔咸亨
以還高宗禮賢時則有至德處俊荷檝翼之垂訓亦
有攀車受覬登牀被恩一言蒙魯衮之厚八體著羲
圖之則五明在手于以見虞帝達聰之勤四座生風
于以彰武王救暍之德御飛白書記日新盛德天
縱多藝師心獨運冠世研精萬象奔馳於筆端三辰
奮湧於毫末翩然而鸞皇飛翥蜿然而虬龍蟠躍聖

域之雄觀書林之具美一字可以逾華袞羣臣莫能望清光摘染所及洪纖畢該宇宙入其胸懷風雲出乎掌握造化協其隱顯陰陽順其卷舒發虛無之蘊而森爲衆形收雷霆之動而歸於精象非元聖之獨智孰能預於此乎

歐陽修御飛白記雲章爛然輝映日月爲之正冠肅容再拜而後敢仰視蓋仁宗之御飛白也仁宗之德澤涵濡於萬物者四十餘年雖田夫野老之無知猶能悲歌於隴畝之間而况儒臣學士得望清光蒙恩寵登金門而上玉堂者乎夫玉韞石而珠藏淵其光

氣常見於外也故山輝如白虹水變而五色者至寶之所在也今賜書之藏於室吾知將有望氣者言榮光起而屬天者必賜書之所在也 蘇軾飛白御書記抱烏號之弓不若藏此筆寶曲阜之履不若傳此書考追蠡以論音聲不若推點畫而究觀所用之意存昌歎以追嗜好不若因褒貶而想其所與之人或藏於名山或流於四方凡見此者皆當聳然而作如望旄頭之塵聽屬車之音和與勉爲忠厚而耻爲浮薄或由此也夫

倬彼昊天日月星辰麗焉堯之文也域彼四海江河
淮漢別焉禹之畫也叙聖文神翰而不以經天緯地
言之何足以形容其大哉 倬彼雲漢爲章于天言
天子爲法於天下也追琢其章金玉其相言萬民觀
而樂之也 經乾緯坤者典學之全功出聖入神者
游藝之餘事 神動天隨超絕衆妙 日行于天委
照萬物之上光氣所及或流爲慶雲結爲丹砂初豈
有意哉 天縱之能溢于筆墨 月壁星珠 瑤禮
飛文 土蟾膚寸墨花泮渙 秋毫精勁霜素凝鮮
奎躔婉其鈎曲珠斗煥乎闌干 河洛開奧 神墨

靈式

大元經戴神
累履靈式

揮毫舉鳳拂素騰龍 寶題雲

蔚翠軸蚪螭

袖有驪珠

東璧華星榮河綠字

農禾八穗漢札十行

玉府神毫珠躔瑞采 天文

景鑠璧合珠連聖札雲迴鸞驚鳳集 鳳藻鸞蹤

帝澤溫潤雨露下國

銀鈎錦帕

太一下觀百靈

潛衛

龍騰鳳掣出入造化躡繇轆義前無千古

天葩睿藻三二曜六五緯

粃糠倉史奴僕鍾王

金壺霏潤瑤管春容

轆轤三光陶鎔帝皇

非煙

祥風緣飾萬物

取諸造物之鑪錘盡用文章之斧

斤

昭章雲漢輝麗日月并包書林聖風雲靡英華

沉浮洋溢八區 墨妙筆精鸞飄鳳泊元氣淋漓不
擇地而施 英雲明露膏耀管茅堯醲舜薰憂切韶
濩 參乾兩離 瓊章寶字媿墳龔經日星昭回被
物成飾 銜帝鴻之墨海挾漢宮之寶跗 穗書綠
字入神出天 金壺琳鈕娛游翰墨 璇跗犀植
奎鉤奮芒河龍獻勢 斟酌元化秋毫膚寸 得心
應手渾然天成 八文六義陰藏陽覩 龍踔龜負
與奎璧日月激衝光明湯盤禹鼎之字方之陋矣
天摹神畫不落彫斲 鸞鳳騫翔而變態烟雲舒卷
以呈姿 秦峯之篆頡篇之楷倒薤之妙拂素之工

研精書林垂思藝圃 奮辭摘藻星漢昭回題毫

拂素龍鸞點絢 璧月珠星扁榜峩峩 天蹤聖能

輔以學力既以系隆五三六經之傳清明在躬精義
入神道腴德輝形於心畫混融天設八法自具妙用
所潛勢逾萬鈞日光雲章垂耀縑素 吉雲玉露下

燭丘壑 游藝致精遂轅書聖原於道德故氣象深

厚發於英華故筆勢超絕 舞鳳翔鸞怒猊渴驥天

球弘璧不足以喻其寶大呂黃鍾不足以喻其雅

綜以造化之機軸斲以陰陽之斧斤濯以江漢之濤

瀾 聰明淵懿藝與道兼肆筆成書八法該備

大明委照卿靄騰輝 侈億萬年琬琰之傳 日珥

爛乎家楹星鈎洒於毫端 龍文龜畫刊在翠琰

光氣昭倬發葩燭幽 包羅五經之郭游神六藝之

圃一言之出四方式以爲典一字之傳萬世寶以爲

訓 雲漢動而日星垂也 榮光溢河寶氣騰池

五雲擁笥鳳翥龍騰 前世所謂畫起平雲點蹲芒

玉者不足以進於此 金壺貯墨 鮫人織冰宮工

裁雪彌綸寶筭泛洒神毫紛如薄霧翳靈芝淡若輕

雲拂初日

飛白

鈿軸寶函龜趺螭首執協龍鸞光

回星斗

琬琰騰華奎璧奮芒

蔭之華棖被之豐

珉 翔筆伸楮 天垂日皎勒諸豐珉 有星而景

有雲而卿其光下垂遇物流形 鸞鶴飛動星辰光

華 字裏金生竹間玉潤 勒諸琬琰貽諸載億與

日月雲漢同垂無極 心畫發舒 帝中第一夫何

足言 羲圖頡迹 如龍行天或遊或飛 草書 金

鈎見象綠字成圖 璧合珠連鸞驚鳳集 奇縱絕

俗美態入神 編之玉軸勒以銀繩 錦帙金牋霞

明日照 口雖未言聲疾雷震令雖未出化馳如神

心有所懷威動千里 壺墨彩毫 芸香却蠹芝髓

爲封珍寶之精下燭西崑之岫文章之氣上躔東璧

之象可謂天下之妙迹域中之奇觀 羲畫垂文奎
鈞賁采 聖藻裁篇首登歌於寶鼎宸毫結字復瀆
墨於金壺 垂光日月動色雲煙 模於琰刻奮以
璠稜 上昭三光下飾萬物 鳳翥龍盤經緯河洛
星鈞日珥闡握乾坤 天光焜煌慶雲葩郁如在上
帝群玉之府如游太微三光之庭 昭回之光照映
天地婉結之妙經麗辰星

玉海卷第三十四終